



Vischnaunca Tujetsch  
Gemeinde Tujetsch

## Invitaziun

# 16. Radunonza dil cussegl da vischnaunca

dil trienni 2014/2017

**venderdis, ils 24 da zercladur 2016, 18.00 uras,**  
ell'aula dalla casa da scola a Sedrun

### Tractandas:

1. Avertura
2. Approbaziun dil protocol nr. 15 dils 27-04-2016
3. Elecziun dil biro dil cussegl:
  - a) president
  - b) vicepresident
  - c) actuar
  - d) dus dumbravuschs e salters communal
  - e) dus suppleants pils dumbravuschs
4. Purschida da cuorsa liunga – amplificaziun digl indrez d'ennevar
5. Orientaziuns
6. Varia

### Suprastonza communal Tujetsch

President communal  
Beat Roeschlin

Menader center communal  
Lucas Collenberg

## **Program**

- 18.00 uras      Seduta dil cussegl da vischnaunca  
ell'aula dalla casa da scola Sedrun
- 19.00 uras      Viseta dalla Marcel Schmid GmbH  
- producziun da tuortas da nuschs
- 20.15 uras      Tscheina communabla  
el Hotel Mira a Sedrun



**Vischnaunca Tujetsch**  
Gemeinde Tujetsch

Cussegl da vischnaunca  
2014/2017

## **Protocol dil cussegl da vischnaunca Tujetsch**

**Nr. 15-2014/17 dils 27 d'avrel 2016**

**Protocol dil cussegl da vischnaunca Tujetsch**

**Nr. 15/2014/17 dils 27 d'avrel 2016**

**allas 20.00 uras entochen allas 21.00 uras ell'aula dalla casa da scola a Sedrun**

---

Presidi:	Otto Curschellas	
Actuar:	Lucas Collenberg	
Dumbravuschs:	Sep Aluis Monn e Severino Solèr	
Presents:	11 cusseglierAs, total 11 votantAs (absolut pli 6)	
Aspectaturs:	5	
Cussegliers:	Arno Berther, Surrein Marc Berther, Gionda Franco Curschellas Diego Curschellas, Gionda Otto Curschellas, Sedrun Gelgia Deplaz, Rueras	Michel Deragisch, Sedrun Christian Gieriet, Sedrun Sep Aluis Monn, Gionda Josi Russi, Sedrun Severino Solèr, Cavorgia
Suprastonza:	Beat Roeschlin, president communal André Schmid, gerau Renato Decurtins, gerau	Mario Hitz, gerau Christian Albin, gerau
Cumissiun da gestiu:	Guido Friberg Norbert Vinzens, cum. da gestiu	Toni Monn
Perstgisas:	René Epp, cusseglier	

**Tractandas:**

1. Avertura
2. Approbaziun dil protocol nr. 14 dils 23-03-2016
3. Rendaquens 2015
  - a) Vischnaunca Tujetsch
  - b) Bogn Sedrun
4. Orientaziuns
5. Varia

## **1. Tractanda      Avertura**

La 15. radunonza dil cussegl da vischnaunca dil trienni 2014/2017 vegn aviarta entras il vicepresident Otto Curschellas cun beneventar tuts presents.

Plaid d'introducziun dil vicepresident Otto Curschellas:

En la seduta da questa sera vegnin nus a tractar il quen annual. Quel dat onn per onn ina buna survesta sur dil curriu e passau digl onn vargau. Als responsabels dalla surprastonza communal lessel far in cumplimeint per il detagliu rapport annual. El ei fetg informativ e dat ina survesta dil vast pensum politic che semova duront in onn ora en nossa vischnaunca.

Sco quei ch'il cantun ha giu communicau va ei bein cun las vischnauncas grischunas. La media dil pei da taglia ei sereducida per 2% igl onn 2014 cumparegliau cugl onn 2013. Dallas 139 vischnauncas grischunas han 100 nudau in gudogn da total 22.4 milliuns francs, las ulteriuras 39 in deficit da total 6.3 milliuns francs.

Era la vischnaunca da Tujetsch sa mussar ora in excellent quen annual 2015. Il cashflow munta a rondond 3.4 milliuns francs e suenter tuttas deducziuns seresulta aunc adina in gudogn da frs. 356'333.12. Deplorablamein vegn ei a vegnir onn per onn pli grev da contonscher da quels buns resultats. Il cantun vegn egl avegnir a stuer spargnar e quei era sin donn e cuost dallas vischnauncas. In bien exempel ei l'ulivaziun da finanzas; pervia d'in sbagli da quintaziun dat ei gia ussa ina correctura dallas contribuziuns pigl onn 2016. 23 vischnauncas ston pagar dapli ni survegnan pli pauc. La vischnaunca da Tujetsch ei deplorablamein ina da quellas vischnauncas che sto pagar dapli, numnadamein frs. 78'668.00.

L'iniziativa dallas habitaziuns secundaras ha entochen oz aunc buca fatg aschi grond effect sin nossas finanzas sco quei ch'ins tertgava, denton enzacu vegn quei ad esser il cass. Ils tscheins d'aua vegnan ils proxims onns a vegnir sut pressiun ed era il turissem ei en ina crisa.

Mo ei dat era caussas positivas. La colligaziun dils territoris da skis sigl Alpsu ni lu pli tard il ressort en Dieni ein mo dus highlights che lain sperar nus sin megliers temps.

Investiziuns ein necessarias sch'ins vul vegnir vinavon. La damonda ei mo nua far ellas. Cheu dat ei bunamein tons meinis sco tgaus. Ei vala denton da metter las dretgas prioritads tier ils projects e cheu essan nus tuts dumandai. L'infrastructura avon maun sto vegni megliurada, p.ex. las sendas cun la tgina dil Rein, il bogn cuvretg ni era il center da sport. Jeu sun perschudius che nus savein mirar cun optimissem e curascha egl avegnir.

Sco davos selubeschel d'engraziar als organs pertuccai per il bien resultat finanzia e surtut era per la buna lavur prestada igl onn vargau.

Cun quels plaids lessel arver la 15avla seduta dil cussegl dil cussegl da vischnaunca dil trienni 2014/2017.

## **2. Tractanda      Approbaziun dil protocol nr. 14 dils 23-03-2016**

Il protocol nr. 14 dils 23-03-2016 vegn approbaus unanimamein.

## **3. Tractanda      Quen 2015**

President communal:

Per igl onn 2015 astga la surprastonza communal presentar in fetg bien quen. Decisivs ei il cashflow, e quel ei cun rondond 3.35 milliuns francs fetg legrevs. Quei vegn era veseivel tier cumparegliazions cun autras vischnauncas. La vischnaunca Walchwil ha per exempel in cashflow negativ.

Il preventiv 2015 quintava cun in cashflow da rodund frs. 600'000.00. Las suandontas posiziuns han menau al meglier resultat che previu el preventiv:

Entradas da taglia	+ frs. 1'250'000 (taglias definitivas dils onns vargai)
Entradas da concessiun	+ frs. 500'000 (tscheins d'aua eav.)
Nova lescha da turissem	+ frs. 300'000 (ina part dallas expensas per il turissem han saviu vegnir curcladas cun entradas da taxas)
Respargns da cuosts	+ frs. 500'000 (la disciplina tier las expensas ei stada fetg buna)
Contribuziuns	+ frs. 200'000 (pli aultas contribuziuns dil cantun eav.)
Total	+ frs. 2'750'000

Il bien quen ha lubiu da scriver giu supplementarmein e far reservas. En vesta ch'ei vegn ils proxims onns ad esser pli grev da contonscher buns quens, ei quei fetg d'engrau. Las entradas vegnan sut pressiu ed en certas spartas vegnan ils cuosts a crescher (p.ex. cuosts socials). Era tier las investi-ziuns vala ei perquei da seconcentrar sin projects che portan ina plivalur.

President cumissiun da gestiun, Guido Friberg:

La cumissiun da gestiun ha l'incumbensa da controllar e d'examinar las differentas spartas dall'administraziun e dil menaschi finanziel dalla vischnaunca Tujetsch. Nossa controlla ha cumpigliau la revisiun dil quen annual dalla vischnaunca da Tujetsch e dil Bogn Sedrun pigl onn 2015.

Sco usitau havein nus discussiunau ils quens en ina sesida comunabla cun la suprastonza communala. Nies rapport a scret cullas constataziuns ei aschuntaus al quen da vischnaunca el messadi. Nus desistin perquei da preleger il rapport.

Il quen 2015 sepresenta danovamein meglier ch'il preventiv. Nus gratulein sin quei fetg bien resultat. D'ina vart meglieras entradas che previu e da l'otra vart la disciplina d'expensas han effectuai quei ordvart bien siaraquen. Sper las deducziuns ordinaras ha il bien resultat lubiu da far deducziuns supplementaras silla facultad finanziaria ed administrativa sco era dad augmentar las reservas per projects futurs. La bilanza ei sauna, cuntegn muort las deducziuns dils davos onns era reservas ed ei ina buna basa ed in levgiament pil futur.

Nus engraziein pil rapport interessant ed informativ sur dallas differentas activitads en vischnaunca. In tal bien resultat ei egl avegnir mo realisabels sche las entradas crodan en quella altezia respectiv ein meglieras che previu e cunzun enten exequir efficientamein ils pensums che appartegnan alla vischnaunca. Las sfidas per la vischnaunca sco era per l'economia ed il turissem ein grondas. La vischnaunca duei procurar per bunas cundiziuns da rama che fan attractiva la vischnaunca per luvrar e habitar.

Nus admettein in cordial engraziament alla suprastonza comunala, allas ulteriuras autoritads e cumis-siuns sco era a tuttas colluversas e colluvers dalla vischnaunca Tujetsch per lur engaschi.

Nus proponin d'approbar il quen communal dalla vischnaunca Tujetsch e dil Bogn Sedrun pigl onn 2015 (cul dretg da referendum) e da dar scarica alla suprastonza comunala, als ulteriurs organs responsa-bels ed all'administraziun.

## Quen vischnaunca

Discussiun:

Cussegliaer Arno Berther:

Il president communal ha en sia introducziun menziunau che la nova lescha da turissem hagi megliu-rau il quen per frs. 300'000.00. Quella constataziun ston ins relativar. Igl ei buca aschia che la vischnaunca ha fatg in gudogn cun las taxas da turissem. La vischnaunca ha dau ora dapli per il turissem che quei ch'igl ei vegniu incassau taxas. Denton han certas expensas che vegnevan finanziadas cun daners da taglia saviu vegnir curcladas cun quellas taxas.

Il president communal dat raschun a cusseglier Arno Berther. Las taxas da turissem tonschan buca per curclar las expensas che la vischnaunca fa per il turissem.

Cussegliaer Christian Gieriet:

Igl ei vegniu impundiu frs. 42'500.00 per sclariments davart il scalegl. Con savens dat ei tals sclari-ments e dat ei gia resultats?

Tenor il president communal settracta ei d'ina expensa unica. La concessiun per l'explotaziun da sca-legal a Calmut che la vischnaunca ha serrau giu cun la Giger SA ei spirada e seprolunghescha ussa mintgamai automaticamein per 1 onn. Per quei motiv ei la suprastanza communal sefatschentada cun ina prolungaziun da quella concessiun. Avon che scriver ora la concessiun ha ei denton valiu d'eruir tgei reservas da scalegl ch'ei aunc avon maun. Ina concessiun sa numnadamein mo vegnir surdada sch'ei ha aunc scalegl che sa vegnir explotaus. Communablamein cun la firma Giger SA, che ha sur-priu la mesadad dils cuosts, ei vegniu fatg sondaschas a Calmut. Ils resultats han mussau che las re-servas da scalegl ein feg mudestas. Sin fundament da quei fatg ha la suprastanza communal decidui da desister da scriver ora la concessiun. La concessiun cun la Giger SA seprolunghescha vinavon mintgamai per 1 onn. Ils cuosts considerabels per la procedura da concessiun san vegnir spargnai.

Cussegliaer Arno Berther:

Ella bilanza figureschan dus novs contos da reservas (2880.07 Reserva paga supplementara persunas d'instrucziun e 2880.08 Reserva ord cunfinaziun da menaschi). Da tgei reservas settracta ei en quels cass?

Tenor il menader center communal Lucas Collenberg entscheiva cun la lescha da scola cantunala re-vedida igl onn da scola gia l'entschatta uost e finescha la fin fenadur. Cun la lescha veglia entscheveva igl onn da scola il settember e terminava la fin uost. Quei ha per consequenza che las persunas d'instrucziun ch'eran engaschadas gia avon la revisiun dalla lescha da scola han dabien ina paga meinsila supplementara tier l'extrada. Per quellas expensas ei vegniu creau ina reserva (2880.07 Re-serva paga supplementara persunas d'instrucziun).

La reserva ord cunfinaziun da menaschi ei vegnida creada entras sligiar si differentas posiziuns transi-torias che figuravan el quen current. Enstagl sligiar si quellas posiziuns el quen current, quei che ha-uess caschunau dameins expensas, ei vegniu fatg ina reserva.

## **Quen Bogn Sedrun**

Gerau Christian Albin:

Il quen dil Bogn Sedrun siara cun in deficit da rodund frs. 380'000.00, quei che munta in deficit meins ault che previu el preventiv (frs. 472'000.00). Risguardai el quen dil Bogn Sedrun ein cuosts da frs. 50'000.00 per in'analisa dil menaschi e dall'infrastructura.

Cusseglia Severino Solèr:

Jeu less gratular alla suprastanza communal sin il bien quen ed engraziar allas autoritads communalas ed a tuts collaboraturs per lur engaschi.

Igl ei vegniu concediu in credit supplementar per far in'analisa dil Bogn Sedrun. Tgei ei vegniu analisau resp. eis ei era vegniu risguardau ils effects ch'il bogn ch'ei previus ad Ursera sa haver sil Bogn Sedrun?

Tenor gerau Christian Albin ei en'emprema lingia vegniu eruiu il basegns da sanaziun dil bogn. Plinavon ei vegniu fatg ponderaziuns davart ina reorganisaziun dil menaschi ed in'amplificaziun dalla purschida cun in bogn ordaviert. En special quei che pertucca il bogn ordaviert vegn la suprastanza communal a far sclariments supplementars.

**Votaziun:**

**Il cussegl da vischnaunca**

- a) approbescha unanimamein il quen annual 2015 cun las amortisaziuns supplementaras buca previdas el preventiv ed il rapport da gestiun 2015 dalla vischnaunca da Tujetsch;**
- b) approbescha unanimamein il quen annual 2015 ed il rapport da gestiun dil Bogn Sedrun;**
- c) dat unanimamein scarica a tuts organs communalas.**

**Quella fatschenta ei suttamessa al referendum facultativ tenor igl artechel 17 lit. a dalla constituziun communal.**

## **4. Tractanda      Orientaziuns**

Gerau Christian Albin:

### **Schlagertage Sedrun 2016**

Sco ins ha gia saviu leger ellas medias han ils dis da schlaghers liug ils 9 e 10 da settember 2016 a Sedrun. Igl onn vargau ha quell'occorrenza giu liug ad Andermatt. Il program vegn communicaus aschispèrt ch'igl ei enconuschent tgei interprets che vegnan a sepresentar.



## 5. Tracanda      Varia

Cusseglie Marc Berther:

Igl onn vargau ein pliras occurrenzas culturalas vegnidas sustenidas entras la vischnaunca (pimp my schlitten, rock se drun), quei ch'ei era endretg. Las uniuns localas prestan medemamein ina gronda lavur en favur dalla cultura. Era quellas uniuns duein retscheiver sustegn finanziel dalla vischnaunca sch'ellas organisaschan occurrenzas ni s'engaschan autruisa.

Cusseglie Josi Russi:

Jeu engraziel alla suprastanza communal per la prontadad da sustener ils dis da schlaghers a Sedrun. Dapi onns vegn discussiunau ch'ei seigi impurtont dad haver in'occurrenza pli gronda la stad ed ina igl unviern. Ad Ursera ein ins trumpaus che l'occurrenza vegn dislocada a Sedrun. Per Tujetsch munta quei ina schanza ch'ei vala da nezegiar, era sch'ella cuosta in tschuat daners. In success, era sur plirs onns, daventan ils dis da schlaghers denton mo sche tuts stattan davostier e porschan lur sustegn.

Cusseglie Severino Solèr:

Jeu less far in compliment per la tabla nera. Quei mied da comunicaziun dat alla populaziun la caschun da s'informar davart las activitads dalla suprastanza communal e vegn schazegiaus fetg.

Gerau Mario Hitz:

Bugen less jeu prender cuort posiziun tier il votum da cusseglier Marc Berther. Las uniuns localas prestan senza dubi ina gronda lavur, quei vesa era la suprastanza communal. Uniuns che han l'intenziun d'organisar in'occurrenza ni in project pli grond duein s'annunziar ad uras tier la vischnaunca cun indicaziuns concretas (finanzas eav.). La suprastanza communal vegn en mintgacass ad examinar talas damondas e tenor pusseivladad sustener quellas.

Il vicepresidente Otto Curschellas siara la radunonza.

Actuar:  
Lucas Collenberg

Vicepresidente:  
Otto Curschellas



**Vischnaunca Tujetsch**  
Gemeinde Tujetsch

Cussegl da vischnaunca  
01-2014/2017

# **Purschida da cuorsa liunga - amplificaziun digl indrez d'ennevar**

**Vischnaunca Tujetsch**

## **Messadi**

dalla suprastanza communal a al cussegl da vischnaunca

Preziau president  
Preziada cussegliera  
Stimai cussegliers

## 1. Situaziun da partenza

La vischnaunca da Tujetsch posseda ina biala e zun preziada purschida da cuorsa liunga. La loipa ha ina lunghezia da 15 km ed ei fetg cuppada. Ei setracta d'ina purschida fetg pretensiusa che vegn cunzun beneventada dils buns curridders da cuorsa liunga. Sin igl unviern 2015-16 ha il tschancun ella zona da mistregn Drun puspei saviu vegnir nezegiaus suenter la terminaziun dallas lavurs dalla NEAT. Quella correctura ha pretendiu differentas mesiras (rampa sut stan da sittar, dislocar seiv dallas ovras electricas Rein Anteriu ed ina ascensiun sin ils Plauns Sedrun). Autras mesiras suondan el decuors dils proxims dus onns (ascensiun definitiva suenter il sutpassadi dalla via Cavorgia e la prolungaziun dalla loipa sin la deponia Val Bugnei). In'ulteriura correctura e migliur essenziala dalla loipa ei succedida sut la stalla dil convischin Daniel Monn da Rueras. La nova loipa e las differentas correcturas ein vegnidas beneventadas dils adherents e hosps da cuorsa liunga.

La gronda schanza che nus havein ei la topografia e la segirtad da neiv. Cunzun l'entschatta dalla stagiun ei la tscherca suenter pusseivladads da cuorsa liunga fetg gronda. Si Tavau p.ex. ei la loipa occupada talluisa, ch'ins sto reservar per astgar ir sin la loipa. Quei aschiditg ch'ei regia ina munconza da neiv. Cun ils indrezs da producir neiv artificiala havein nus saviu garantir ina purschida minimala gia baul ella stagiun da cuorsa liunga. In problem che sedat adina puspei ei la problematica cun las cundiziuns, cunzun cun las temperaturas per saver far neiv. Il temps da bassas temperaturas ston ins saver nezegiar aschi bein sco pusseivel. Da bunas relaziuns ston ins haver ina buna capacita, quei ch'ins contonscha cun avunda aua ed avunda indrezs da producir neiv (canuns).

## 2. Finamiras

La purschida da cuorsa liunga duei vegnir migliurada sin ils suandonts secturs:

Augmentar la lunghezia dalla loipa da 12 km sin 15 km	Cun augmentar savein nus esser commembers tier Loipen Schweiz e savein aschia era generar entradas supplementaras da quella organizaziun. Cun la terminaziun dallas lavurs dalla NEAT eis ei pusseivel da contonscher quei. La davosa prolungaziun dalla loipa vegn a succeder ella Val Bugnei.
Midadas tier la loipa	Cuntinuadamein lein nus migliurar la loipa ed aschia procurar che la purschida vegn adina pli attractiva. Singulas migliurs ein previdas enta Tgamaura, via dil Drun e via Cavorgia. Pli-navon sedattan grondas migliurs en connex cun la halla plurivalenta. In ulteriu project pertucca l'illuminaziun dalla loipa el contuorn dalla piazza da ballapei e Plauns Camischolas.
Purschidas da cuorsa liunga	En collaboraziun cun Sedrun Mustér Turissem ston las purschidas da cuorsa liunga retscheiver ina pli ferma posiziun. Cun crear purschidas specialas duein novs hosps vegnir carmalai en nossa regiun.
Organisaziun d'occurrências	Sper nossa usitada cuorsa dil maraton e la cuorsa d'affons energia alpina, ch'ei cumbinada cun il Leonteq-Cup, sesprovan ils responsabels adina puspei da gudignar novas cuorsas en nossa Val. Aschia ha Swiss Ski gest surdau ils campionadis Svizzers dils juniors igl unviern 2017-18. Ulterius cuorsas stattan en discussiun, cunzun ella presesiun.

#### 4. Producziun da neiv artificiala

Igl onn 2012 ha la vischnaunca saviu realisar ils indrezs da producir neiv artificiala ella vischinonza dalla serenera Prau Cumin tochen tier il campadi Rein. Plinavon han ins adina produciu supplementarmein deposits da neiv e prolungiu la purschida atras igl uaul davart dretga dil Rein. La lungezia dallas loipas ennevas munta denter 1.5 e 2.5 km. Cun in augment dalla purschida savein nus garantir aunc ina pli liunga loipa ed aschia porscher aunc pli bunas cundiziuns ella presesiun. Igl augment dalla loipa ei previus dadens igl ual dalla Val Milar. Cun 4 ulteriuras staziuns d'ennevar san ins curclar giu la loipa sper il Rein sco era sil plaun su (plaun nua che l'ovra da Val Giuv sesanfla). En tut san ins porscher aschia ina loipa denter 3.0 e 4.0 km.

Igl avantatg dil niev tschancun se presenta era tier l'organisaziun da cuorsas. Ei sedat dapli variantas, las qualas san tenor basegns era sedifferenziar ellas pretensiuns. In ulteriu avantatg ei segiramein era la pusseivladad d'engrondir il tschancun enviers Dieni.

Ils cuosts d'investiziun muntan à **frs. 200'498.35** e secumponan sco suonda:

- Furniziun material e canun da neiv (TechnoAlpin Schweiz AG)	frs.	73'443.70
- Lavurs dad electro e scavament (energia alpina)	frs.	116'054.65
- Taxa da colligiazion (energia alpina)	frs.	11'000.00

Ei setracta d'in credit da rama. Plinavon spetga la vischnaunca sin differents sustegns davart la promozion dall'economia, davart Loipen Schweiz e davart la regiun.

#### 5. Purschidas da cuorsa liunga

La vendita dallas purschidas da cuorsa liunga s'auda all'organisaziun Sedrun Mustér Turissem. En col-laboraziun cun ils territoris da cuorsa liunga vischinonts (Loipa Cadi, Campra, Ursera e Goms) emprovan ins sur l'organisaziun San Gottardo da vender meglier las purschidas da cuorsa liunga. Quei succeda cun in prospect communabel, cun purschidas dils mieds publics e cun organisar cuorsas ella regiun. Cun las purschidas gia avon maun (Surselva Maraton e cuorsa d'affons energia alpina cup) vulein nus promover la cuorsa liunga ed aschia carmalar adina dapli hosps en nossa regiun.

#### 6. Tariffas

Las tariffas da cuorsa liunga per la purschida ordinaria restan sco tochen dacheu:

Pass Svizzer	140.00 francs
Carta locala (loipa Tujetsch)	120.00 francs
Carta dall'jamna (loipa Tujetsch)	40.00 francs
Carta dil di (loipa Tujetsch)	10.00 francs

La vendita dallas cartas da cuorsa liunga muossa il svilup e la damonda carschenta:

<b>Cartas da cuorsa liunga</b>	<b>2011-12</b>	<b>2012-13</b>	<b>2013-14</b>	<b>2014-15</b>	<b>2015-16</b>
Pass Svizzer	131	136	156	191	177
Carta locala (loipa Tujetsch)	62	78	82	46	47
Carta dall'jamna (Tujetsch)	25	41	90	52	52
Carta dil di (Tujetsch)	211	277	506	375	444
<b>Sviulta</b>	<b>23'645.00</b>	<b>26'877.00</b>	<b>35'081.55</b>	<b>36'498.00</b>	<b>35'984.20</b>

Duront ils onns 2007-08 e 2009-10 muntava la sviulta à rodund frs. 15'000.00. Dapi las stentas da migliurar la purschida e cunzun las investiziuns els novs indrezs d'ennevar ei la damonda carschida considerablamein. Ils sport da cuorsa liunga schai el trend e vegn apprezziaus dad adina dapli curridras e curriders.

## 7. Damonda da baghegiar BAB

Per l'amplificaziun digl indrez dad ennevar drova ein ina lubientscha da baghegiar. La damonda sto vegnir tarmessa al cantun sco „normala“ damonda da baghegiar ordeifer la zona da baghegiar (BAB). Quella damonda ei gia vegnida inoltrada. Plinavon ha la vischnaunca consultau ils proprietaris da terren.

## 8. Conclusiun

Ils cundrezs da far neiv artificiala ein secumprovai dil tuttafatg ils onns vargai. La vischnaunca da Tujetsch ha saviu porscher bunas loipas gia ella presesiun mo grazia a quellas investiziuns. Il davos temps eis ei denton era semussau, ch'ei fuss d'engrau da saver far in tec dapli loipa cun neiv artificiala che quels rodund 2 km che nus havein entochen ussa fatg. Per saver attrer dapli curriders ed oravontut caders da muntada cantunala ni naziunala, ils quals procurassen era per pernottaziuns, fuss ei necessari da saver augmentar la purschida sin 3 entochen 4 kilometers. Era fuss ei fetg d'engrau dad acquistar in secund canun da neiv.

## 8. Proposta


Sebasond sin las suranumnadas ponderaziuns

propona

la suprastonza communal al cussegl da vischnaunca

**da realisar in'ulteriura etappa cun cundrezs d'ennevar cun 4 staziuns ed in canun per la producziun da neiv artificiala e conceder persuerter in credit da rama da frs. 200'498.35. La realisaziun ei previda el decuors digl atun 2016.**

**Suprastonza communal Tujetsch**



President communal  
Beat Roeschlin



Menader center communal  
Lucas Collenberg